



Broj: 04-04-4-4175/24
Sarajevo, 30. 12. 2024. godine

**SAOPĆENJE ZA JAVNOST O OBJAVLJENOM IZVJEŠTAJU REVIZIJE UČINKA
„PRAĆENJE REALIZACIJE PREPORUKA IZ IZVJEŠTAJA
'UPRAVLJANJE ROBNIM REZERVAMA U FEDERACIJI BiH'”**

Ured za reviziju institucija u Federaciji Bosne i Hercegovine proveo je praćenje realizacije preporuka iz Izvještaja revizije učinka „Upravljanje robnim rezervama u Federaciji BiH”, objavljenog 2022. godine. Cilj je bio ispitati preduzete aktivnosti i procijeniti u kojoj mjeri su date preporuke realizovane.

Praćenje je obuhvatilo aktivnosti Vlade Federacije BiH i kantonalnih vlada, te Federalne i kantonalnih direkcija robnih rezervi, poduzete u periodu od decembra 2022. do septembra 2024. godine, na realizaciji ukupno 11 preporuka.

Rezultati praćenja pokazuju da su poduzete određene aktivnosti na realizaciji preporuka ali da nije došlo do značajnih pomaka u predmetnoj oblasti. Većina subjekata odgovornih za realizaciju preporuka je poduzela početne ili djelimične aktivnosti na njihovoj realizaciji.

Parlamentarna komisija odgovorna za reviziju nije razmatrala Izvještaj revizije učinka čije preporuke su bile predmet praćenja, zbog čega nisu doneseni zaključci kojima bi se dodatno obavezale nadležne institucije na efikasnu realizaciju.

Započete su aktivnosti na izradi novog zakona o federalnim robnim rezervama. Međutim, on nije izrađen u ostavljenom roku i dostavljen Vladi Federacije BiH na usvajanje. Izostala je i saradnja između Vlade Federacije BiH i kantonalnih vlada po pitanju usaglašavanja zakonskih rješenja i preciziranja pitanja od značaja za efikasno i koordinirano upravljanje robnim rezervama.

Većina Direkcija za robne rezerve je izrađivala bilanse roba, ali oni nisu bili u potpunosti odgovarajući. Pored toga, izrađivale su programe/planove robnih rezervi koji ne sadrže sve zakonima propisane elemente. Izostala je odgovarajuća saradnja između Federalne i kantonalnih direkcija robnih rezervi u planiranju, nabavkama i rasporedu robnih rezervi.

Većina direkcija nije blagovremeno vršila nabavke roba za potrebe robnih rezervi, te i dalje različito tumače i primjenjuju Zakon o javnim nabavkama. Čuvanje i ekonomično skladištenje robnih rezervi još uvijek predstavlja izazov.

Uvažavajući činjenicu da su robne rezerve od općeg interesa za Federaciju i kantone, Ured za reviziju cijeni da je neophodno poduzeti dodatne aktivnosti za realizaciju datih preporuka. Navedeno će osigurati uspostavljanje funkcionalnog, efikasnog i ekonomičnog sistema upravljanja robnim rezervama.

Izvještaj revizije učinka dostupan je na internet stranici Ureda za reviziju: www.vrifbih.ba.



GENERALNI REVIZOR
Mirza Kudić